

SIARAN AKHBAR

S.A. 2023/08/10_45 (HQ)

PRU DUN KE-15 DI ENAM NEGERI: TNB SIAP SIAGA PASTIKAN BEKALAN STABIL 12 OGOS INI

- Lebih 2,500 anggota kerja TNB ditugaskan untuk memantau dan menunggu sedia setiap masa
- Lori-lori janakuasa bergerak dan set janakuasa mudah alih telah ditempatkan di lokasi strategik dan sedia diatur gerak

Tenaga Nasional Berhad (TNB) telah membuat persiapan bagi memastikan bekalan elektrik di semua 3214 Pusat-Pusat Mengundi dan 180 Pusat-Pusat Penjumlahan Rasmi Undi bagi negeri Kedah, Kelantan, Terengganu, Pulau Pinang, Selangor dan Negeri Sembilan berada dalam keadaan baik pada hari pengundian Pilihan Raya Umum (PRU) Dewan Undangan Negeri (DUN) ke-15 serta Pilihan Raya Kecil (PRK) Parlimen Kuala Terengganu, 12 Ogos ini.

Menurut Ketua Pegawai Rangkaian Pembahagian (Chief Distribution Network Officer) TNB, Wan Nazmy Wan Mahmood, lebih 2,500 orang anggota kerja TNB ditugaskan untuk sentiasa berada dalam tunggu sedia di lapangan dan bilik-bilik gerakan operasi di negeri-negeri terlibat ketika proses pengundian PRU DUN ke-15 ini.

“TNB telah pun melakukan persiapan awal dalam usaha memastikan aspek teknikal, operasi dan tunggu-sedia bekalan elektrik ke lokasi-lokasi tersebut sentiasa terjamin. Kami juga telah menempatkan pasukan-pasukan petugas bagi memantau dan menunggu sedia untuk lokasi-lokasi penting ini,” katanya.

Sebanyak 198 lori janakuasa bergerak dan 144 set janakuasa mudah alih telah ditempatkan sebagai tunggu sedia diatur gerak untuk memberikan bekalan sekiranya diperlukan.

“Situasi bekalan elektrik seluruh negara dipantau setiap masa sehingga proses penjumlahan rasmi undi yang dijangka berlanjutan sehingga tengah malam pada 12 Ogos atau awal pagi keesokan harinya,” katanya lagi.

Jelas Wan Nazmy, TNB menghargai kerjasama dan bantuan yang telah diberikan oleh pihak Suruhanjaya Pilihan Raya Malaysia (SPR), Jabatan Kerja Raya (JKR) dan Pihak Berkuasa Tempatan (PBT) di setiap negeri terbabit bagi mendapatkan maklum balas perincian keperluan elektrik di semua pusat mengundi dan penjumlahan undi.

“Daripada situ, kami telah pun mengambil langkah-langkah yang diperlukan. Insya-Allah semuanya akan berada dalam keadaan terkawal,” tambahnya.

Sebelum ini proses penamaan calon pada 29 Julai lalu dan proses pengundian awal pada 8 Ogos berjalan lancar tanpa sebarang kejadian gangguan bekalan.

Sebagai langkah berjaga-jaga, TNB mengulangi peringatan kepada semua pihak agar mengelak daripada melakukan kerja-kerja pengorekan tanah dalam usaha mengurangkan risiko menyentuh kabel elektrik, sekali gus menghindari kemungkinan berlaku gangguan bekalan elektrik akibat kerosakan kabel.

Dikeluarkan di Kuala Lumpur pada 10 Ogos 2023, jam 11:00 pagi

*Untuk pertanyaan lanjut media, sila hubungi Hanim Idris 019-2617617 /
Grace Tan 016-6626229 / Faiq Haikal 013-3889606
atau emel kami: media@tnb.com.my*



Ketua Pegawai Rangkaian Pembahagian (Chief Distribution Network Officer) TNB,
Wan Nazmy Wan Mahmood

Lori-lori janakuasa bergerak dan set janakuasa mudah alih telah ditempatkan di lokasi-lokasi strategik sebagai tunggu sedia dan diatur gerak untuk memberikan bekalan sekiranya diperlukan.

